



Broj: 01/5-50-1-6-3/07
Sarajevo, 11.4.2007.godine

Z A P I S N I K
4. sjednice Komisije za saobraćaj i komunikacije,
održane 11.4.2007. godine

Sjednica je održana 11.4.2007., s početkom u 15,15 sati.

Sjednici su prisustvovali članovi Komisije:

- | | |
|----------------------------------|-----------------------|
| 1. Branko Dokić, predsjedavajući | 6. Husein Nanić |
| 2. Velimir Jukić | 7. Mehmed Suljkanović |
| 3. Šemsudin Mehmedović | |
| 4. Sadik Sado Bahtić | |
| 5. Selim Bešlagić | |

Opravdano su odsustvovali Snježana Rajilić i Savo Erić.

U ime Vijeća ministara BiH sjednici je prisustvovao Kojo Koprivica, pomoćnik ministra komunikacija i prometa BiH.

Sjednici je prisustvovao i sekretar Komisije za saobraćaj i komunikacije Ahmed Jalovičić.

Predsjedavajući Branko Dokić predložio je sljedeći

D N E V N I R E D

1. Izbor drugog zamjenika predsjedavajućeg Komisije saobraćaj i komunikacije Predstavničkog doma Parlamentarne skupštine BiH,
2. Usvajanje Zapisnika 3. sjednice, održane 12.3.2007.godine,
3. Prijedlog zakona o izmjenama i dopunama Zakona o osnovama sigurnosti saobraćaja na putevima u BiH – predlagač: Dom naroda Parlamentarne skupštine BiH (procedura po starom Poslovniku Predstavničkog doma),
4. Prijedlog zakona o izmjenama i dopunama Zakona o osnovama sigurnosti saobraćaja na putevima u BiH – predlagač: poslanik Mehmed Suljkanović (radi podnošenja mišljenja u skladu s članom 104. Poslovnika Predstavničkog doma),
5. Tekuća pitanja.

Dnevni red jednoglasno je prihvaćen.

Ad. 1.

Prijedlog predsjedavajućeg da se za drugog zamjenika predsjedavajućeg Komisije izabere Velimir Jukić članovi Komisije usvojili su jednoglasno.

Ad. 2.

Na Prijedlog zapisnika nije bilo primjedbi, pa je Komisija jednoglasno verificirala Zapisnik 3. sjednice, održane 12.3.2007.godine.

Ad. 3.

Predsjedavajući je podsjetio da je Prijedlog zakona usvojen na Domu naroda, otvorio raspravu i pozvao predstavnika Vijeća ministara BiH da se izjasni o Prijedlogu zakona.

Kojo Koprivica ukazao je da je prilikom usvajanja Zakona o osnovama sigurnosti saobraćaja na putevima u BiH razmatran amandman sa istim sadržajem kao današnji Prijedlog zakona, ali da je tada odbijen s obrazloženjem da jedino Crveni križ jednoobrazno na cijeloj teritoriji Bosne i Hercegovine osposobljava kandidate za vozače vozila na motorni pogon za pružanje prve pomoći. S obzirom na navedeno, Vijeće ministara BiH ne podržava usvajanje Prijedloga zakona.

Selim Bešlić istakao je da je već ranije bilo ovakvih prijedloga, te da smatra da eventualno treba pokrenuti aktivnosti da Crveni polumjesec objedini djelovanje s Crvenim križem i da ne podržava usvajanje Prijedloga zakona.

Predsjedavajući je istakao da se, ukoliko je pravno moguće, objedini djelovanje Crvenog križa i Crvenog polumjeseca i da Ministarstvo komunikacija i prometa BiH treba utvrditi da li je to moguće, kao i da ne podržava Prijedlog zakona.

Husein Nanić smatra kako bi trebalo provjeriti da li postoji mogućnost da i Crveni polumjesec osposobljava kandidate za vozače za pružanje prve pomoći.

Nakon provedene opće rasprave, Komisija za saobraćaj i komunikacije većinom glasova (pet glasova “protiv” i jedan “suzdržan”) nije prihvatila tekst Prijedloga zakona.

Komisija je u raspravi o ovoj tački dnevnog reda usvojila sljedeći zaključak:

Uzimajući u obzir približno isti djelokrug poslova Društva crvenog krsta/ križa BiH i Crvenog polumjeseca BiH, sugerira se Crvenom polumjesecu BiH da inicira aktivnosti s ciljem pronalaženja mogućnosti da se, kroz saradnju s Društvom crvenog krsta/ križa BiH, i Crveni polumjesec BiH uključi u organiziranje obuke za osposobljavanje kandidata za vozače iz nastavnog predmeta pružanja prve pomoći.

Ukoliko se ne realizira navedena inicijativa, Komisija smatra da je potrebno, podnošenjem amandmana na Zakon o osnovama sigurnosti saobraćaja na putevima u BiH, pružiti mogućnost i Crvenom polumjesecu BiH da organizira obuku iz nastavnog predmeta pružanja prve pomoći.

Ad. 4.

Predsjedavajući je ukazao da se danas razmatraju samo principi Prijedloga zakona, te dao riječ predlagачu Zakona.

Mehmed Suljkanović istakao je da je tražio da se Prijedlog zakona razmatra po skraćenoj proceduri, ali da je na Domu usvojeno da se razmatra u redovnoj proceduri.

Kojo Koprivica smatra da principi Prijedloga zakona nisu sporni, podsjećajući da je ranije Predstavnički dom usvojio kazne koje predlaže i Mehmed Suljkanović, ali da je, prilikom usaglašavanja teksta Zakona o osnovama sigurnosti saobraćaja na putevima u BiH, usvojen prijedlog Doma naroda o blažim kaznama.

Selim Bešliagić ukazao je da Prijedlog ide u redovnu proceduru, pa će još biti amandmana kojim će se tražiti izmjene i dopune Prijedloga zakona.

Velimir Jukić pitao je da li je Ministarstvo komunikacija i prometa BiH upoznato sa iskustvima s terena prilikom provođenja Zakona, naročito o naplati kazni.

Kojo Koprivica istakao je da je kratak period od stupanja na snagu Zakona, te da treba vremena za analize, kao i da se prekršajni nalog koristi samo za najniže kazne. Cilj je da se ide na suzbijanje uzimanja gotovog novca, jer ukoliko se ne plati prekršajni nalog, primjera radi u iznosu od 100 KM, može se u redovnom sudskom postupku izreći i znatno veća kazna.

Predsjedavajući smatra da je bolje imati u početku blaže sankcije, kao i da će biti još amandmana na Zakon, da će se eventualno ukazati potreba za organiziranjem Javne rasprave o Zakonu o osnovama sigurnosti saobraćaja na putevima u BiH, te da podržava principe Prijedloga zakona.

Nakon provedene opće rasprave, Komisija je jednoglasno podržala principe Prijedloga zakona.

Ad. 5.

Predsjedavajući je upoznao prisutne da je imao kraći sastanak s predstavnikom nevladine organizacije NDI, koji ga je obavijestio da žele ostvariti saradnju s Komisijom, da mogu pomoći pri organiziranju javnih rasprava, kao i omogućiti učešće članovima Komisije na seminarima koje organizira NDI, pa smatra da ova pomoć može biti korisna u daljnjem radu Komisije. Podsjetio je da je na prošloj sjednici Komisije usvojen zaključak da Ministarstvo komunikacija i prometa BiH u što kraćem roku izradi i uputi u parlamentarnu proceduru Prijedlog zakona o Agenciji za informaciono društvo BiH, ali da Ministarstvo do sada nije dostavilo odgovor u vezi s tim.

Komisija je jednoglasno usvojila zaključak da se uputi urgencija Ministarstvu komunikacija i prometa BiH.

Komisija je primila k znanju dopise Javnog RTV sistema o zahtjevu za povećanje RTV takse i JP Elektroprivreda Hrvatske zajednice Herceg-Bosne o problemima u poslovanju.

Sjednica je završena u 16,10 sati.

SEKRETAR KOMISIJE
Ahmed Jalovičić

PREDSJEDAVAJUĆI KOMISIJE
dr. Branko Dokić